

Bun on da gestiun chi permetta diversas prefinanziaziuns

La radunanza cumünala da Zernez ha fat bun in gövgia saira unanimamaing il rendaint 2025 cun ün guadogn net da 878 707 francs. Includ i'l quint d'eiran eir quatter prefinanziaziuns in l'import da 2,6 milliuns francs. La ledscha da sepultura e sunteri es gnüda deliberada a man da la votumaziun a l'urna.

JON DUSCHLETTA

Il nouv contabel e manader dal repart finanzas ed impostas dal Cumün da Zernez, Tinet Flura, ha pudü preschantar pro sia prüma cumparsa avant radunanza cumünala cifras allegraivlas.

Il quint da success da l'on da gestiun 2025 serra pro entradas da 26,18 milliuns francs cun ün guadogn net da 878 707 francs, raduond 165 000 francs daplü sco previs i'l preventiv. Il resultat es tant plü positiv, pervi chi han pudü gnir fattas quatter novas prefinanziaziuns in l'import total da 2,6 milliuns francs: 1,2 milliuns pel proget da sanaziun da la Via Maistra, 700 000 francs pel rimplazzamaint da la punt da l'En Madinas, 500 000 francs pella Via da god Munt Baselgia e 200 000 francs pel rimplazzamaint da las paracullas dals stands da tir da 50 e 300 meters pro'l tir da schabgias a Zernez. Üna prefinanziaziun da 300 000 francs per vias champestras e da god ha invezza pudü gnir scholta.

Dürant l'on da gestiun 2025 ha il Cumün da Zernez investi passa 3,8 milliuns francs. Da quai resulta ün import d'investiziuns nettas da 2,49 milliuns francs. Cun ün milliun francs es gnü dovra il plü grond import per l'ultima etappa da sanaziun da la sarinera. Insomma han ils tschinch progets ils plü gronds, tanter da quels ün terz ardader pel l'implant da s-chodamaint sün distanzen opür üna nova maschina per far loipas, chaschunà 65 pertschient dals cuosts d'investiziun.

Passa ün milliun francs es gnü miss in amortisaziuns e s-chars ün mez milliun sül conto per finanziaziuns specialas. Uschè resulta ün cashflow da s-chars duos milliuns francs pro ün grà d'aigna finanziaziun da 179 pertschient. Implü ha pudü gnir diminui l'import da debit per abitanta ed abitante da 2040 francs a



Eliana e Karl Wieser han survgnü our dals mans dal capo cumünal Domenic Toutsch il premi d'energia 2025 dal proget «Zernez Energia 2020» per la vasta sanaziun energetica da lur chasa a Zernez.

fotografia: Jon Duschletta

la fin dal 2024 sün amo 760 francs a la fin da l'on passà.

Ledscha da sunteri armonisada

La radunanza cumünala, preschaint d'eiran 45 votantas e votants, ha discus e deliberà in seguit eir üna nova ledscha da sepultura e sunteri armonisada sur las quatter fracziuns Zernez, Brail, Susch e Lavin. Cun singuls pitschens müdamaints vain quella ledscha suottamissa als 27 settember a la votumaziun a l'urna. La ledscha regla tanter oter ils detagls da la sunasoncha, da la dürada da las fossas opür dals cuosts liats a las pussibilitats e fuormas da sepulturas e da fossas.

Sco cha'l capo cumünal Domenic Toutsch ha accentuà, sajan gnüdas resguardadas illa nova ledscha las üsanzas e tradiziuns in connex cun fats da sunteri e sepultura existents da mincha singula fracziun. Scha'l suveran disch schi a la nova ledscha in settem-

ber, alura dess quella entrar in vigur pel 1. october da quist on.

Quatter sez vacants ils gremis

Il capo ha inavant infuormà, cha in dumengia, 27 settember, ha eir lö il prim scrutin da las elecziuns e reelecziuns cumünalas per la perioda d'uffizi 2027 fin 2030. Stand hoz, as metta tant Domenic Toutsch a disposiziun per un'ulteriura perioda d'uffizi sco eir la supranza actuala. A causa da limitaziun da temp d'uffizi sun vacants illa cumischium sindicatoria sün la fin 2025 ils duos sez da Claudia Duschletta-Müller e da Gian Carlo Neuhäusler ed our dal cussagl da scuola sortan Mireille Thom e Linard Neuhäusler.

I'l Cumün da Zernez prevezza d'inviar dals 10 avuost fin als 9 d'october la procedura d'intervenziun a regard la revisiun totala da la planisaziun locala. Als 20 avuost es previs a las 20.00 üna sairada d'infuormaziun in l'auditori dal

Parc Naziunal a Zernez a regard la chosa.

Wiesers guadognan premi d'energia

Daspö l'on 2019 onurescha il Cumün da Zernez sanaziuns energeticas extraordinarias da stabilimaints cul premi d'energia our dal fondo dal proget «Zernez Energia 2020». Il premi es dotà cun 1000 francs e vain surdat in fuorma d'üna plaketta da lain da dschember. Il premi d'energia pel 2025 han guadagnà Karl ed Eliana Wieser per la vasta sanaziun energetica da lur chasa in Davo Röven a Zernez.

Sco cha Karl Wieser ha dit invers la Posta Ladina, as tratti da sia chasa paterna in quella ch'el es creschü. La famiglia Wieser ha fabrichà intuorn la chasa in trais abitaziuns ch'els nüzzieschan insembel cun lur duos uffants güsta svesa. La chasa veglia engiadinaisa, ella es gnüda fabrichada tenor Wieser in sia fuorma oriunda avant passa 400

ons, saja probabelmaing la prüma chasa veglia engiadinaisa chi haja pudü gnir isolada externamaing. In collavuraziun cul architect Romedi Castellani es gnüda isolada la fatschada cun duodesch centimeters izolaziun da lana da crap. Ingiò pussibel sun gnüdas isoladas ulteriusas parts da la construcziun in l'intern dal stabilimaint. Uschè eir il fuond dal palantschin sur las abitaziuns. Il palantschin ed il têt sun pel rest üna construcziun fraida.

Las trais abitaziuns han survgnü novas fanestras cun trais vaders e vegnan s-chodadas sia tras l'attach al s-chodamaint cumünal sün distanzen e sülla basa da zipplas da lain, sco eir tras pignas svedaisas in minch'abitaziun. Al muimaint spettan ils Wiesers amo sül permis per pudair construir ün Car-Port, sün quel ch'els prevezzan eir l'installaziun da 18 meters quadrats d'implant fotovoltaic per generar surtuot forza d'inviern.

Forum d'elecziun

Politica per soluziuns a favur da la gliעד e da las regiuns

Id es vaira chi dovra illa Regenza grischuna a persunas chi rapreschaintan differentas opiniuns, ma i dovra impustüt personalitats chi fan quai e na partits. Aita Zanetti rapreschainta il Grischun dal süd e las valladas periferas da nos Chantun. Ella ha muossà sias competenzas sco presidenta cumünala e presidenta dal Grond cussagl. Ella es üna duonna chi ha competenzas sül sector da la sandà, in dumondas da cultura e sco paura cugnoscha ella ils bsögns da l'agricultura e da gestiuns pitschnas. Sco duonna dal Center es ella surtuot sensibilisada per verer e resguardar las tematicas ed ils bsögns da la populaziun. Ella es libra d'as dedichar a

soluziuns, sainza dar prioritä ad ideologias chi valan daplü co tuot il rest in partits a dretta o a schneistra. Perquai es Aita Zanetti tenor mai quella personalità chi sa rapreschainta il plü bain il Grischun dal Süd e nossas valladas da las periferias aint illa Regenza.

Eir ils candidats dal Center per las tschernas dal Grond cussagl illa regiun Engiadina Bassa e Val Müstair fan politica orientada a bunas soluziuns sainza esser liats vi dad ideologias chi disturbant da far quai. Saja quai il deputà da fin qua per la Val Müstair, Rico Lamprecht, chi sainza grond tapasch lavura daspö ons vi da bunas soluziuns eir per nossas regiuns. Eir il candidat i'l Circul da Ramosch, Mario Denoth, es üna personalità dal god e dal sport cun competenzas e perseveranza schi va per soluziuns per nossa gliעד e nossas regiuns periferas. O lura il cusglier cumünal da Zernez in Sur Tasna, Armando Roner, chi ha muossà da nun avair be ün ögl

per verer las problematicas ed ils bsögns da nossa regiun, ma eir üna gronda voluntä da chattar la dretta via per gnir inavant. Ed in Suot Tasna, Fadri Häfner, cun interess e competenzas multifaras da chant, cretta, cultura ed oter plü es il cusglier cumünal chi rapreschainta la plü pitschna da las fracziuns da Scuol e cugnoscha tuot la regiun. Laura Koppenberg, la commembra dal Center giuven nu voul surlaschar l'avegnir be ad oters, ma analizar e fuormar eir ella las vias pel futur. Els tuots sun candidats, per ils quals i vala la paina dad ir a vuschar e da dar la vusch. Eir Aita Zanetti chi ha fingià muossà ch'ella sa lavurar in ün parlamaint ed in üna executiva, ha meritä da las votantas ed ils votants da Suot Tasna la vusch pel Grond cussagl e quella per la Regenza - sper Carmelia Maisen e Marcus Caduff, eir dal parti dal Center.

Grazcha fich per Vos sustegn.

Hermann Thom, Susch

Acceptà la planisaziun pel «Paradies Ftan»

Grischun La Regenza grischuna ha aprovà officialmaing la revisiun parziala da la planisaziun d'utilisaziun pel proget turistic «Paradies Ftan» e confermà cun quai cun vigur legala la decisiun dal pövel dal november 2025. Il proget survain glüm verda sün tuot ils nivels - dal cumün fin pro'l Chantun.

Il quartier «Il Paradis» a Ftan survain cun quai ün nouv avegnir: La populaziun dal cumün da Scuol vaiva dit da schi in november 2025 cun gronda majorità a la revisiun parziala da la planisaziun d'utilisaziun chi's referischa al proget, e vaiva uschè fat liber la via per la nova concepziun dal lö tradiziunal.

Davo la serrada da l'hotel in settember 2023 perseguiteschan la Paradies Resort SA da Horst Rahe sco proprietaria ed il cumün da Scuol cumünalmaing il böt d'establi al lö ün proget turistic confuorm al temp e da s-chaffir cun quai novas plazzas da lavur sco eir üna construcziun d'ota qualità chi valütescha in möd d'ürabel il purtrel dal lö da Ftan. Quai scriva la dit-

ta d'architects Fanzun SA, sco autura dal proget e respunsabla per la realisaziun planisatorica. Ils cuosts d'investiziuns vegnan calculats cun plüs desch milliuns da francs. In stretta collavuraziun cul cumün e sia cussagliaziun da fabrica sco eir cul planisader dal territori respunsabel, Stauffer Studach, saja la planisaziun d'utilisaziun orientada al proget e saja gnüda elavurada daspö il 2024 cun chüra e manada a fin cun success, scriva la Fanzun SA.

«L'approvaziun tras il chantun Grischun es ün term important pel lö da Ftan e per tuot la regiun da Scuol. La collavuraziun stretta e constructiva cul cumün ha pür pussibilità quist success. Ün ingrazchamaint special va a la presidenta cumünala Aita Zanetti chi ha sustgnü il proget da prüma davent cun forza e chi s'ha ingaschada cun grond ingaschamaint personal pel svilup turistic illa regiun», vain cità Gian Fanzun, partenari e manader da svilup pro la Fanzun SA, illa comunicaziun a las medias. (cdm/Fanzun SA)